



SAMÞYKKTIR

fyrir byggðasamlagið Odda bs.

1. gr.

Samkomulag um byggðasamlag

Sveitarfélögin Ásahreppur, kt. 430169-0339, Laugalandi, 851 Hellu, og Rangárþing ytra, kt. 520602-3050, Suðurlandsvegi 1 – 3, 850 Hellu, hafa samþykkt að stofna byggðasamlag um rekstur leik- og grunnskóla sveitarfélaganna, þ.e. Leikskólann Laugalandi, Heklukot Hellu, Laugalandsskóla og Grunnskólann Hellu.

Heiti byggðasamlagsins er Oddi bs. og er heimili þess og varnarþing í Rangárþingi ytra.

2. gr.

Ábyrgð og eignarhluti

Byggðasamlagið er stofnað skv. 94. gr. sveitarstjórnarlaga nr. 138/2011. Sveitarfélögin bera einfalda ábyrgð á fjárhagslegum skuldbindingum byggðasamlagsins en innbyrðis skiptist ábyrgðin í hlutfalli við íbúatölu. Eignarhluti hvors sveitarfélags er reiknaður samkvæmt ákvæðum 4. gr. samþykktanna.

3. gr.

Verkefni

Byggðasamlagið starfar í umboði sveitarstjórnanna og nær til alls reksturs skólanna að undanskildum fasteignum.

Aðildarsveitarfélögin fela byggðasamlaginu að reka af metnaði og framsækni leik- og grunnskóla sveitarfélaganna í samræmi við gildandi lög um leikskóla og grunnskóla. Stefnt skal að því með markvissum áætlunum og aðgerðum að skólarnir verði í fremstu röð á landinu bæði hvað varðar innra starf og aðbúnað. Til þess að svo megi verða skal stjórn byggðasamlagsins, í samráði við skólastjóra og aðila sem seturétt hafa í fræðslunefnd, hafa forgöngu um að leggja fram í upphafi hvers kjörtímabils sveitarstjórna áætlun til næstu fjögurra ára hvað þetta varðar. Skal hún að frumkvæði stjórnar byggðasamlagsins endurskoðuð og metin árlega í upphafi skólaárs. Í áætluninni skal kveðið á um áherslu í endurmenntun/starfsþróun starfsmanna skólanna með áherslu á að gefa starfsfólki kost á að afla sér starfsréttinda og þeim sem þegar eru með starfsréttindi kost á endurmenntun. Einnig er áhersla á skólaþróun, markviss áform um samvinnu skóla og tengsl við atvinnulífið í sveitarfélaginu. Leggja ber áherslu á góðan árangur nemenda, aukinn þroska og gleði af skólagöngunni. Síðast en ekki síst ber að leita leiða til að nýta þau fjölmörgu tækifæri sem til staðar eru í þessum vel búnu sveitarfélögum til farsældar fyrir börn, ungmenni og þar með alla íbúa sveitarfélaganna.

4. gr.

Rekstrarleg ábyrgð aðildarsveitarfélaganna

Rekstrarleg ábyrgð sveitarfélaganna í byggðasamlaginu er mismikil og byggist á fjölda nemenda í leik- og grunnskólum sveitarfélaganna. Skal ábyrgðin miðast við fjölda nemenda frá hvoru sveitarfélagi í skólunum 1. október ár hvert og haldast óbreytt út skólaárið, þ.e. til 31. júlí ári síðar. Þessi ábyrgð er grundvöllur kostnaðarskiptingar við alla almenna nemendatengda þjónustu sveitarfélaganna. Með nemendatengdri þjónustu er átt við öll útgjöld sveitarfélaganna vegna skólagöngu nemenda, svo sem allan launakostnað, kostnað vegna námsefnis og annars kennsluefnis,



Eftir yfirllestur Sesselju Árnadóttur 22.10.2015 og umfjöllun í samráðsnefnd 27.10.2015

rekstur bókasafna, skólaakstur, húsaleigu, rekstur mótuneyta, aðkeypta sérfræðipjónustu, kostnað vegna vettvangsferða og annað sem með beinum hætti tengist námi nemenda. Þessi útreikningur á ekki við um einstaklingsúthlutanir til nemenda.

5. gr

Skólarnir innan byggðasamlagsins

Stofnun byggðasamlags um rekstur leik- og grunnskóla hefur ekki áhrif á faglegt sjálfstæði skólanna. Stjórn byggðasamlagsins í hlutverki fræðslunefndar ásamt lögbundnum áheyrnarfulltrúum hefur yfirsýn yfir faglegt starf leik- og grunnskóla sveitarfélaganna. Þeir starfa áfram sem sjálfstæðar einingar og sem deildir innan byggðasamlagsins. Þeir starfa eftir eigin skólanámskrá sem byggir á lögum um leik- og grunnskóla og aðalnámskrá hverju sinni ásamt því að fylgja sameiginlegri skólastefnu Ásahrepps og Rangárþings ytra.

Breyting þessi á rekstrarformi leik- og grunnskólanna skal á engan hátt skerða réttindi og skyldur starfsmanna skólanna.

6. gr.

Val um skóla

Stofnun byggðasamlags um rekstur leik- og grunnskóla sveitarfélaganna skal ekki hafa áhrif á heimaskóla barna og ungmenna sveitarfélaganna eins og þeir voru við stofnun byggðasamlagsins (Fylgiskjal 1). Þó gefst foreldrum barna í sveitarfélögunum kostur á að velja um skóla innan byggðasamlagsins svo fremi sem aðstæður í skólunum leyfi og ekki komi til aukins kostnaðar vegna nemanda. Skal það gert að höfðu samráði við skólastjóra beggja skólanna hvort sem um er að ræða leik- eða grunnskóla og að öllu jöfnu gengið formlega frá því fyrir 1. maí vegna komandi skólaárs.

7. gr.

Skipan stjórnar

Stjórn byggðasamlagsins skal skipuð fjórum aðalmönnum, þ.e. oddvitum beggja sveitarfélaganna og tveimur fulltrúum úr byggðaráði Rangárþings ytra. Jafnframt skulu skipaðir fjórir varamenn úr hópi aðal- eða varamanna í sveitarstjórn. Stjórnarmenn skulu kosnir af sveitarstjórnnum í upphafi hvers kjörtímabils og skal kjörtímabil stjórnarinnar vera hið sama og sveitarstjórnanna. Oddviti Rangárþings ytra er formaður stjórnar en að öðru leyti skiptir stjórnin með sér verkum.

Sveitarstjórar beggja sveitarfélaganna eiga rétt til setu á fundum stjórnar byggðasamlagsins með málfrelsi og tillögurétt. Sveitarstjóri Rangárþings ytra fer með framkvæmdastjórn byggðasamlagsins.

8. gr.

Stjórnarfundir

Stjórnarfundur er ályktunarhæfur ef löglega hefur verið til hans boðað og meirihluti kjörinna stjórnarmanna er mættur til fundar. Við afgreiðslu mála skulu stjórnarmenn leggja sig fram um að komast að sameiginlegri niðurstöðu. Ef til atkvæðagreiðslu kemur og atkvæði falla jöfn þá gildir sú regla að atkvæði formanns sker úr. Á það við um hefðbundin viðfangsefni stjórnar og að öllu jöfnu, en óski stjórnarmaður eftir þá ber að vísa viðkomandi úrlausnarefni til sveitarstjórna beggja sveitarfélaganna til umræðu milli stjórnarfunda.

Stjórnin heldur að jafnaði fundi mánaðarlega. Formaður stjórnar boðar til stjórnarfunda. Fundarboð skal berast stjórnarmönnum og áheyrnarfulltrúum þegar það á við eigi síðar en tveimur sólarhringum fyrir fund. Boðun funda skal fara fram með rafrænni tilkynningu á netfang fundarmanna. Fundargögn skulu gerð aðgengileg með rafrænum hætti. Fundarboði skal fylgja dagskrá fundar og þau gögn sem nauðsynleg eru til að fundarmenn geti tekið upplýsta afstöðu til mála sem þar eru tilgreind.



Eftir yfirllestur Sesselju Árnadóttur 22.10.2015 og umfjöllun í samráðsnefnd 27.10.2015

Hver stjórnarmaður getur krafist aukafundar. Aukafund skal boða ekki síðar en tveimur sólarhringum eftir að ósk þar um berst formanni stjórnar. Fundarboð vegna aukafundar skal sent svo fljótt sem auðið er og ekki síðar en sólarhring fyrir fund.

Aðalmenn bera ábyrgð á boðun varamanna. Stjórnarfundir skulu skráðir og afrit af fundargerðum send sveitarstjórnnum aðildarsveitarfélaganna.

Stjórn Odda bs. gegnir hlutverki fræðslunefndar, sbr. 45. gr. laga um grunnskóla nr. 91/2008 og 4. gr. laga um leikskóla nr. 90/2008. Stjórn byggðasamlagsins getur einnig ákveðið að stofnuð skuli sérstök nefnd til að fara með hlutverk fræðslunefndar á vegum byggðasamlagsins sbr. 45. gr. laga um grunnskóla nr. 91/2008. Þegar stjórnin fjallar um málefni sem falla undir verksvið fræðslunefndar lögum samkvæmt skulu áheyrnarfulltrúar eiga rétt til setu á fundum stjórnarinnar skv. 4. mgr. 6. gr. laga um grunnskóla og 2. mgr. 4. gr. laga um leikskóla.

9. gr. Fjármál

Allar ákvarðanir stjórnar byggðasamlagsins sem skuldbinda sveitarfélögin skulu hljóta samþykki beggja sveitarstjórna áður en þær taka gildi. Stjórnin getur því ekki skuldbundið aðildarsveitarfélögin umfram það sem kveðið er á um í fjárhagsáætlun byggðasamlagsins sem samþykkt er af báðum sveitarstjórnnum.

Skólastjórum skólanna ber að skila drögum að rekstraráætlun næsta árs til stjórnar byggðasamlagsins eigi síðar en 1. október ár hvert þar sem gerð er grein fyrir fjár- og húsnæðisþörf skólanna vegna komandi árs. Stjórnin tekur við drögum, gerir athugasemdir ef þess gerist þörf og ber síðan að skila drögum að fjárhagsáætlun næsta árs til aðildarsveitarfélaganna eigi síðar en 15. október ár hvert þar sem gerð er grein fyrir fjárþörf byggðasamlagsins vegna komandi árs. Með drögum að fjárhagsáætlun skulu jafnframt fylgja drög að gjaldskrár vegna leik- og grunnskóla sem samþykktar skulu af báðum sveitarstjórnnum í tengslum við afgreiðslu fjárhagsáætlunar byggðasamlagsins.

Tekjur byggðasamlagsins eru framlög sveitarfélaganna eins og þau eru tilgreind í samþykktri fjárhagsáætlun, framlög frá Jöfnunarsjóði sveitarfélaga og þjónustutekjur samkvæmt gjaldskrár eða samningum.

Stjórnin skal fylgjast með að rekstur skólanna sé innan fjárheimilda og bregðast við ef út af ber. Eins ber stjórninni að taka tillit til réttmætra erinda frá skólastjórnnum vegna ófyrirsjáanlegra breytinga sem verða á skólahaldi og útvega aukið rekstrarfé frá aðildarsveitarfélögum ef svo ber undir.

Stjórninni er heimilt að semja við aðildarsveitarfélag um þjónustu við byggðasamlagið, s.s. fjármálalega umsýslu.

Stjórnin staðfestir ársreikninga byggðasamlagsins fyrir ár hvert og miðast reikningsárið við almanaksárið. Reikningar byggðasamlagsins skulu endurskoðaðir af löggiltum endurskoðanda sem stjórn þess ræður til starfsins með samþykki sveitarstjórna aðildarsveitarfélaganna. Vinna skal ársreikninga í samræmi við ákvæði laga um bókhald og ársreikninga, svo og aðrar góðar bókhalds- og reikningsskilavenjur, skv. 59. gr. laga nr. 138/2011.

Senda skal fullgerðan ársreikning, staðfestan af stjórn byggðasamlagsins og áritaðan af endurskoðanda til beggja aðildarsveitarfélaga fyrir 15. apríl ár hvert.

10. gr. Endurskoðun samþykktar og slit byggðasamlagsins

Endurskoða skal samþykktir þessar að þremur árum liðnum því þá er nokkur reynsla komin á fyrirkomulagið. Einnig skal endurskoða samþykktirnar ef breytingar verða á lögum sem um málaflokkinn gilda. Heimilt er að bregðast við augljósum hnökrum sem kunna að koma í ljós svo fremi sem tillaga um slíkt sé samþykkt af báðum sveitarstjórnnum.



Eftir yfirllestur Sesselju Árnadóttur 22.10.2015 og umfjöllun í samráðsnefnd 27.10.2015

Hvort sveitarfélag getur sagt upp aðild að byggðasamlaginu með tveggja ára fyrirvara miðað við áramót. Um úrsögn sveitarfélags úr byggðasamlaginu eða slit þess fer að öðru leyti eftir 95. gr. sveitarstjórnarlaga nr. 138/2011.

**11. gr.
Gildistaka**

Samþykktir þessar öðlast gildi við staðfestingu innanríkisráðuneytisins. Gert er ráð fyrir að byggðasamlagið taki til starfa frá og með 1. janúar 2016 og skulu sveitarstjórnir aðildarsveitarfélaganna þá hafa kosið fulltrúa í stjórn, sbr. 7. gr. samþykktanna. Þrátt fyrir það gilda samþykktirnar ekki um yfirstandandi skólaár en koma að fullu til framkvæmdar við undirbúning komandi skólaárs. Núverandi fræðslunefnd starfar jafnframt til 31. júlí 2016.

Laugalandi/Hellu dagsetning

Undirskrift sveitarstjórnar Ásahrepps

Undirskrift sveitarstjórnar Rangárþings ytra.

Staðfesting innanríkisráðuneytisins